

Votus Natál 2012 ba Website

Irmán doben sira,

Ha'u iha hakaran boot atu to'o iha Uma ida-idak no tama iha imi-nia fuan atu kunprimenta imi Natál santu ida ho koslok no domin boot.

Natál ida foun nafatin tanba halo ita hakfodak, mistériu ida domin nian ne'ebé envolve no invade ho kbiit maka'as istória umanidade nian, família nian, foin-sa'e sira-nian, ita-nia moris rasik, no ema ida-idak nia moris ne'ebé fahe ho ita dalan fiar nian no empeñu atu eduka.

Ita moris Natál ida ne'e iha *Tinan Fiar* nia roman ne'ebé habiit ita-nia fiat iha eventu Liafuan ne'ebé halo an ba ema no ohin mós hakarak harii nia taka-baluk iha ita leet, hakarak horik ho ita (kf *Jn1,14*). Furak tebes hanoin katak Maromak nia domin suli iha kriasaun, iha ninia kriatura sira no hakarak hetan fatin ida ne'ebé simu nia, Maromak la kole atu hein, atu iha pasiénsia atu *uma*, katak umanidade tomak, nabilan ho roman foun, esperansa metin, konfiansa foun.

Ha'u-nia votus ba Institutu konkretu, simples no ha'u fahe ho fuan tomak: atu komunidade ida-idak bele sai *uma ne'ebé simu Jezús no, iha Nia, ema hotu ne'ebé moris iha nesesidade, iha babukak lialoos nian, dame nian, justisa nian, liuliu foin-sa'e sira.*

Komunidade ne'ebé reflete Belein nia oin iha-ne'ebé msitériu Inkarnasaun marka inísiu tampu esperansa nian. Ita husik atu esperansa daet ita, tubun foun ne'ebé maski ki'ik iha kbiit maka'as.

Natál foun tanba hamanas fuan no loke ba possibilidade ksolok sira prezente iha mundu, prezente iha ita-nia realidade sira, no husu atu hatudu an atu habelar buat di'ak ne'ebé ema sira hein atu bele fiar liután, atu hein liután, atu hadomi liután, atu fó liután.

Ha'u hanoin kona-ba ita-nia komunidade sira, barak hanesan iha Belein, frajil karik, maibé *uma ho odamatan nakloke* iha-ne'ebé hatene simu no sai besik, iha-ne'ebé harii komuñaun, iha ne'ebé *ativizmu* no atrasaun ba *kuantidade* fó fatin ba domin iha pasiénsia ho finalidade atu harii relasaun di'ak, valoriza tempu moris loroloron iha ne'ebé Maromak sai prezente no ko'alia ba fuan liuhusi jestu konkretu domin nian, atensaun sinsera ba ema seluk, solidariedade ba ema ne'ebé hein buat rumá ka ema rumá atu moris ho serenidade liután no ho esperansa.

Ita la subar ita-nia preokupasaun ba situasaun krítika terus nian iha zona barak mundu nian tanba motivu ekonómiku, pobreza morál, negasaun ba direitu fundamentál sira ema nian, esplorasaun ba sira ne'ebé fraku no defeza-laek, liuliu labarik sira.

Konserteza difisil tebes hanoin ba sira Natál ida hakmatek nian.

Ha'u konvida imi atu luta ho korajen boot liután no determinasaun, situasaun sira-ne'e hodi sai konstrutora komuñaun nian, solidariedade nian iha imi-nia moris loroloron nian, hodi halakon husi imi-nia moris sensasaun deziluzaun nian, dezánimu nian ka inutilidade nian. Ita hotu simu bolun atu sai sujeitu ativu iha buat di'ak.

Bele hetan de'it fekundidade se ita tau abut iha Jezús, se simu Nia iha ema sira-ne'ebé ita la'o loroloron hamutuk no iha-ne'ebé Na'i tau iha ita-nia sorin atu Ninja domin bele hola isin no sai vizivel liuhusi ita.

Ita simu bolun ho maneira impresionante, atu sai parte moris iha mistériu inkarnasuan nian no halo nia nabilan liuhusi ita-nia sasin moris nian no ho obra konkreta karidade nian.


Ha'u sei hanoin momoos beatifikasiadaun irmán Maria Troncatti nian foin dauduan ne'e, misionária Maromak nia domin nian, aten-barani no haraik-an atu kuda obra di'ak sira, ne'ebé hatene halo tetuk sentimentu sira violénsia nian no hafunu-malu nian iha ahi-funan naroman nian, iha possibilidade konvivénsia iha hakmatek laran. Nia, ho meiu umanu simples sira no ho vida fiar ne'ebé metin, hatene harii *uma* iha-ne'ebé ema ho nesesidade hatene katak nia bele asesu no hetan ema ne'ebé simu, hetan konfortu, tulun no ksolok.

Tebes duni nia mak foto ida ho marka “natividade” nian iha-ne'ebé iha ai-laran Amazónia ekuatoriana harii “uma domin Maromak nian”, *Belein foun* iha-ne'ebé Domin hetan uma atu horik bá.

Maria, Jezús nia Inan no ita-nia Inan prepara ita-nia fuan atu sai *uma ne'ebé hatene simu* atu celebra ho fiar foun Maromak nia Oan-Mane nia moris.

Ba imi, irmán doben sira, ba membru sira Família Saleziana nian, liuliu maun-alin Salezianu sira, ba ema lubun boot ne'ebé fahe ho ita empeñu atu eduka no haklaken Liafoun Di'ak Evanjellu nian, ba foin-sa'e wain ne'ebé ha'u hasoru iha ha'u-nia viajen sira, ha'u halo votus tinan foun ida hakmatek no dame nian.

Ha'u agradese imi ba saudasaun barak ne'ebé to'o mai ha''u no sira ne'ebé sei mai tuir tan no ha'u asegura ha'u-nia orasaun konstante.

A handwritten signature in blue ink, appearing to read "Sr. Yvonne Remyost".

